

АКАФИСТ ПРЕСВЯТЕЙ БОГОРОДИЦЕ В ЧЕСТЬ ИКОНЫ ЕЯ «ОДИГИТРИЯ»

Кондак 1

Избранней от всех родов, небеси и земли Царице, Пресвятей Богородице Одигитрии, яко избавльшеся от вечныя смерти благодатию от Тебе рождшагося Христа Бога нашего и Твоим Матерним пред Ним ходатайством, благодарственное пение приносим Ти, раби Твои. Ты же, Всемиловитая наша Заступнице, от всяких нас бед и скорбных обстояний свободдай и к царствию горнему путеводствуй, да зовем Ти:

Радуйся, Богородице Одигитрие, христиан упование.

Икос 1

Архангельский глас вопием Ти, Чистая: радуйся, Благодатная Одигитрие Марие, и радости духовныя исполни нас, да благоговейною душею и чистым

сердцем принесем Ти, рождшей миру Спасителя
Христа Бога нашего, глаголы сия:

Радуйся, Бога Отца благоволением осененная; радуйся,
Бога Сына Мати неискусобрачная.

Радуйся, Бога Духа Святаго обитель священная;
радуйся, Троицкия тайны проявление.

Радуйся, ангельских умов удивление; радуйся,
человеческаго рода украшение.

Радуйся, горняя с дольными совокупившая; радуйся,
врата райския земнородным отверзшая.

Радуйся, лестнице небесная; радуйся, стамно
Богоприимная. Радуйся, купино неопалимая; радуйся,
трапезо пресвятая.

Радуйся, Богородице Одигитрие, христиан упование.

Кондак 2

Видев икону Пресвятаго Твоего лика, Богородице
Деву, юже всехвальный евангелист Лука написа, рекла

еси о ней пречистыми усты Твоими: «С сею иконою благодать Моя и сила». Такое обетование Твое уведевше, благоговейно почитаем пресвятый образ Твой, Владычице, и воспеваем Сыну Твоему и Богу: Аллилуиа.

Икос 2

Уразумев благоволение Твое, Богородице, к сей иконе Твоей, славный апостол Лука дарова ю в благословение и освящение Христовой Церкви Антиохийстей, в ней же Путеводительницей она наименовася и чудеса божественными прославися. Осем благодаряще Тя, Госпоже Всеблагая, яко подобие пречистаго лика Твоего во утешение нам оставила еси, усердно Тебе вопием:

Радуйся, Царице горних и дольних; радуйся, Владычице ангелов и человеков.

Радуйся, мира умирение; радуйся, древняя вражды

разрушение. Радуйся, девства столпе; радуйся, смирения глубино.

Радуйся, облаченная в солнце; радуйся, сияющая Божественною славою. Радуйся, Мати Света Невечерняго; радуйся, раю сладости небесных.

Радуйся, вертограде Христов благоуханный; радуйся, одре Царя Великаго. Радуйся, Богородице Одигитрие, христиан упование.

Кондак 3

Силою Божию чудеса предивныя совершахуся от иконы Твоея, Богомати Владычице, егда принесена бысть в Царьград и в преславнем Влахернстем храме поставлена; слепыя просвещаше, всяк недуг в людех врачеваше благодатию Твоею, Богородице, да вси зовем прославльшему Тя Богу: Аллилуиа.

Икос 3

Имеяше Тя Царьград Заступницу державную, Богородице Дево, и во дни нападения на него врагов

сильных и бранеискусных, помощь Твою
многочудную от святых иконы Твоя Одигитрии
получаше. Темже молимся Тебе, Всеблагая, якоже
древле град оный многажды от погибели спасла еси,
тако и нас смиренных спаси от погибели вечныя
Матерним предстательством Твоим ко Христу Богу, да
благодарно зовем Ти:

Радуйся, Царьграда крепкое ограждение; радуйся,
Влахернского храма благодатное сокровище.

Радуйся, нечестивых ратей одоление; радуйся, врагов
Православия посрамление.

Радуйся, чад Христовых Предводительнице к победам;
радуйся, Помощнице скорая в бедах к Тебе
притекающих.

Радуйся, Заступнице усердная молитвенно Тя
призывающих; радуйся, богомудрых святителей
споспешнице во благовестии Христовом.

Радуйся, похвало жен и дев славо; радуйся, столпе огненный, зной страстей умеряющий.

Радуйся, столпе облачный, мрак грехов разгоняющий; радуйся, Марие, Мати Христа Бога нашего.

Радуйся, Богородице Одигитрие, христиан упование.

Кондак 4

Бурею морскою корабли прегордаго Кагана, град Твой пленити восхотевшаго, сокрушила еси, Владычице, и победу над ним людем христоименитым даровала еси от святых иконы Твоя Одигитрии, лучи света небеснаго испуская и вои православных ими просвещая, да вси уведят, яко Ты еси воистину Воевода державная Царьграда и прославят милости Твоя и чудеса, воспевая Спасителю Богу: Аллилуиа.

Икос 4

Слышавше о чудесех Твоих преславных, Богородице Дево, яже от иконы Твоя явила еси в Царьграде,

недоумеем, како икона та, носимая по стогнам града,
силою Божественною носившими ю управляше и
стопы их по воле Твоей направляше; направи убо,
Владычице, и наша стопы на путь исполнения
заповедей Христовых, и научи нас верно исполняти
святую волю Сына Твоего и Бога, да Тебе вопием сице:

Радуйся, свеще неугасимая; радуйся, звездо
незаходимая.

Радуйся, сияющая светом Божественным; радуйся,
просвещающая благодатию души верных.

Радуйся, мира Христова благоухание; радуйся, земли
освящение.

Радуйся, чаше, черплющая радость всему миру;
радуйся, источнице, изливающий вечную сладость.

Радуйся, чертоже благоукрашенный Царя Царей;
радуйся, рая краснейшая. Радуйся, утра светлейшая;
радуйся, ручко всезлатая.

Радуйся, Богородице Одигитрие, христиан упование.

Кондак 5

Яко Боготечная звезда, икона Твоя, Богомати Владычице, благоволением Твоим от Царьграда в страну Российскую принесеса, и граду Смоленску в наследие благодатное даровася, темже благодарим Тя, о Госпоже Всемиловитая, яко таковой дар святыи Отчеству нашему даровала еси, и поем в Троице славимому Богу: Аллилуиа.

Икос 5

Видевше преславное заступление Твое града Смоленска, Пречистая Владычице, прославляем великую Твою милость, ею же град сей от разорения Батыева чудесно спасла еси, гласом Божественным от иконы Твоея исшедшим, угодника Христова Меркурия на единоборство с предводителем рати Батыевой послав; его же он мечем своим порази и град Твой от запаления огненнаго избави. Самого же его венцем мученическим увенчала еси, того молитвами

небесными сподоби нас на земли неосужденно взывати к Тебе:

Радуйся, мученика Христова Меркурия на подвиг ратный укрепившая; радуйся, гласом от иконы Твоя святых его воодушевившая.

Радуйся, яко Давида на Голиафа победою его увенчавшая; радуйся, града Смоленска крепкое защищение.

Радуйся, град Твой от разорения избавившая; радуйся, Избавительнице от плена и поражения.

Радуйся, страны Российския благодатное утешение; радуйся, Церкви Христовой Боголепное украшение.

Радуйся, любящих Тя присное радование; радуйся, Утолительнице печалей. Радуйся, болящих исцеление; радуйся, унывающих в скорбех ободрение.

Радуйся, Богородице Одигитрие, христиан упование.

Кондак 6

Проповедует страна Российская милости и чудеса Твоя, Пречистая Дево Богородице, и град Смоленск светло красуется, имея чудотворную икону Твою, всякия болезни исцеляющую и недужным здравие подающую. Сего ради со благоговением почитаем многоцелебный образ Твой, Госпоже Всеблагая, и поклоняющися ему, яко залогу Твоего к нам благоволения, вопием Богу: Аллилуиа.

Икос 6

Воссияла еси в стране Российстей лучами Божественных чудес от святяя иконы Твоя исходящими, Пречистая Владычице, к ней же от лет древних отцы наши прихождаше в скорбех и болезнях и нетщеты отхождаше. Им же вслед и мы к Тебе приходяще и с любовию благоговейно лобызая образ Твой чудотворный, молимся Тебе: утоли печали наша, уврачуй недуги наша, да зовем Ти:

Радуйся, жезле старости; радуйся, вдовиц заступление.

Радуйся, сирот признание; радуйся, младенцев воспитание. Радуйся, нищих снабдение; радуйся, пленных освобождение.

Радуйся, скорбящих утешение; радуйся, столпе и утверждение девства. Радуйся, иноков Покровительнице; радуйся, инокинь Наставнице.

Радуйся, постников укрепление; радуйся, в подвиге девства подвизающихся вспоможение.

Радуйся, Богородице Одигитрие, христиан упование.

Кондак 7

Хотя даровати граду Москве причастие благодати от святых иконы Твоея, Владычице Всемиловитая, благоволила еси принести икону Твою от Смоленска в Москву, да тамо пребывая, чудеса многими прославится. Егда же по умолению жителей Смоленска, возвращашеся образ Твой святой в град их, на месте прохождения иконы Твоея Одигитрии обитель дев во имя Твое сооружена бысть; в ней же

под осенением чудотворная иконы Твоя с верою и любовью воспеваем немолчную песнь Богу: Аллилуиа.

Икос 7

Новосозданная обитель инокинь во граде Москве благоговейно чествует святое подобие чудотворная иконы Твоя Одигитрии, милости неизреченная источающей верным, еяже осенением люди православная благодатно утешаеши и в подвигах поста и молитвы утверждаеши, подвизая их немолчно воспевати Матерняя Твоя щедроты и благодарно взывати Тебе:

Радуйся, Богом возлюбленная Царице; радуйся, Бога возлюбившая паче всего Владычице.

Радуйся, едина благословенная в женах; радуйся, небесных радование. Радуйся, земных заступление; радуйся, демонов посрамление.

Радуйся, ада попраение; радуйся, укрепленная силою
Господа Сил.

Радуйся, облеченная властью Царицы неба и земли;
радуйся, воинствующих на плоть целомудрием благая
Помощнице.

Радуйся, подвизающихся в посте и безмолвии
милостивая Утешительнице; радуйся, избавляющая
скорбей всяческих.

Радуйся, Богородице Одигитрие, христиан упование.

Кондак 8

Странствие земное многоскорбное и многомятежное
улаждаеши нам Матерним Твоим о нас попечением,
Богородице, и во дни скорбных обстояний помощь
святую являеши нам во спасение. Памятуем и
исповедуем, Владычице, Твое заступление, егда галлы
страну Российскую разориша и град Москву плениша,
Ты икону Свою святую Одигитрию от Смоленска в

полцы воинства Российскаго благоволила еси
принести и тем вои православныя воодушевила еси,
славную победу им даровала еси, предстательством
Твоим к Сыну Твоему и Богу. Ему же поем: Аллилуиа.

Икос 8

Вся милости и щедрот преисполненная, Всеблагая
Мати Божия, воинству православному помощь и
одоление на враги преславно даровала еси. И егда не
бе нам уже спасения надежды, яко и наш град пленен и
разорен бысть, галлы с бесчестием от Отечества
нашего отгнала еси и победою дивною нас увенчала
еси. Всегда памятуя таковое Твое заступление,
хвалебно Тебе вопием:

Радуйся, страну нашу Российскую от нашествия
иноплеменных предивно избавившая; радуйся, гордых
силою Своею со стыдом вспять возвратившая.

Радуйся, иноверных ратей Всесильная
Победительнице; радуйся, православнаго воинства

державная пособнице.

Радуйся, иконою Твоею святою с воинами
Российскими милостивно пребывающая; радуйся,
чудотворным образом Твоим полки их освящающая.

Радуйся, изнемогающих силою свыше укрепляющая;
радуйся, беспомощным помощь Твою святую
подающая.

Радуйся, обидимых правосудная Заступнице; радуйся,
ненадежных надеждо. Радуйся, печальных отрадо.
Радуйся, Богородице Одигитрие, христиан упование.

Кондак 9

Вси вернии с радостию и утешением видят образ Твой
святой, на немже умиленно взираеши на
Богомладенца Христа, сего ради молим Тя, Всеблагая,
яко Матерь вся содержащаго в деснице Своей
Владыки: возри и на нас милостивно, и умоли
Господа, да помилует нас недостойных. Научи нас,

Владычице, молитися Ему благоприятно, и неосужденно пети Ему нескверными усты и чистым сердцем ангельскую песнь: Аллилуиа.

Икос 9

Витийство наше песненное не довлеет к прославлению многих Твоих чудес, Богородице Одигитрие, их же от святых иконы Твоя явила еси и присно являеши верным: обаче Ты, яко воистину Благая Мати, веру и усердие наше приими; веси бо и любовь к Тебе нашу, еюже сердца наша пламенеют, и милостивно услыши сии в простоте составленные похвалы:

Радуйся, обрадованная Приснодево; радуйся, Невесто Невестная. Радуйся, селение Бога Слова; радуйся, обитель Святейшаго святых.

Радуйся, с Сыном Царем небес вечно царствующая; радуйся, Матернее дерзновение к Нему имущая.

Радуйся, молитвам верных милостивно внимлющая;

радуйся, любящим Тя любовью Твоею Божественною
воздающая.

Радуйся, Сиона горняго украшение; радуйся, мира
дольняго защищение.

Радуйся, граде спасения нашего; радуйся, горо святая,
сошествием Божиим прославленная.

Радуйся, Богородице Одигитрие, христиан упование.

Кондак 10

Спаси нас, Владычице, от погибели вечныя Матерним
предстательством Твоим ко Христу Богу, и сподоби
нас узрети Тя в час кончины нашея, от руки лютаго
миродержителя душу нашу соблюдающую; да
помощию Твоею святою избегнем его сетей и
сподобимся Царствие Небесное получитьи и в радости
вечней воспевати Человеколюбцу Богу: Аллилуиа.

Икос 10

Стена еси девам, Богородице Дево, и всем ревнителем девства и чистоты усердная Помощнице. Молим Тя, Пречистая, очисти наша сердца от всякия скверны греховныя, и украси души наша целомудрием и чистотою, да невредимы пребудем от всех искушений мира, плоти и диавола находящих, и сподобимся достойно возглашати Тебе песни таковая:

Радуйся, добрая Младопитательнице девам; радуйся, благосердая Попечительнице сирот.

Радуйся, тихое прибежище обуреваемых страстями; радуйся, надежное пристанище смущаемых искушениями.

Радуйся, Мздовоздаятельница подвижников
целомудрия; радуйся, Споборнице борющихся со враги
невидимыми.

Радуйся, милостивая Посетительнице неповинно
осужденных; радуйся, благая Утешительнице напрасно
оклеветанных.

Радуйся, Божественная Свободительнице сущих в
плену и изгнании; радуйся, всемогущая
Покровительнице труждающихся и обремененных.

Радуйся, Судии Праведного умоление; радуйся,
грешных с Богом примирение.

Радуйся, Богородице Одигитрие, христиан упование.

Кондак 11

Пение всеуниверсальное слышаще от верных рабов Твоих
возносимое Ты, Пречистая Мати Дево, яко имущая
милосердие неизреченное, насыти нас пищею

нетленную Слова Божия и научи нас всегда исполнять животворныя заповеди Господа нашего; Его же умоли, Предстательнице наша Всеблагая, да ниспослет милость Свою нам недостойным и сподобит нас унаследовати Его всесветлое и всеблаженное Царствие, идеже от всех святых поется Ему хвалебная песнь: Аллилуиа.

Икос 11

Светлыми лучами чудес Твоих, Богородице Дево, просвещаеши нас благодатно, и от святых иконы Твоя Одигитрии утешение духовное ниспосылаеши угодникам Божиим. Нам же, грешным, дары целебныя подаеши от Нея неоскудно, да зовем Ти благодарственно и хвалебно:

Радуйся, Агнца и Пастыря Нетленного рождающая;
радуйся, девство и рождество в Себе сочетавшая.

Радуйся, крине девства, к чистому и девственному

житию приводящая; радуйся, избранникам Божиим любовь Твою святую являющая.

Радуйся, угодникам Господним веления небесная открывающая; радуйся, преподобного Сергия Радонежского посещением Твоим сподобившая.

Радуйся, преподобного Кирилла Белозерского гласом от иконы Твоея на Белоезеро направившая; радуйся, преподобного Савватия Соловецкого в подвигах пустынных укрепившая.

Радуйся, святителя Митрофана Воронежского иконою Твоею облагодатствовавшая.

Радуйся, обителей Христовых покров и снабдение; радуйся, рабов Божиих среди мира тайное вразумление.

Радуйся, Богородице Одигитрие, христиан упование.

Кондак 12

Благодать Божия действует в чудесах, преславно являемых от святого образа Твоего, Преблагословенная Богородице Дево, ею же и наши души просвети, мрак греховный разгоня сиянием Солнца Правды Христа, да во свете повелений Его богоугодно житие сие временное проживем во всяком благочестии и чистоте и сподобимся блаженство вечное получитьи и со избранными пети Богу: Аллилуиа.

Икос 12

Поюще Твоя чудеса, Богородице, проповедуем милости Твоя, прославляем щедроты Твоя неисчетныя и, припадая к чудотворней иконе Твоей, молимтися с верою и любовию: буди нам Путеводительница Благая к светлому граду Иерусалиму Небесному, да узрим Тя с высоты славы Твоя Божественныя на нас милостивно взирающую и вкупе со святыми воспоем Ти сице:

Радуйся, радости наша пресвятая; радуйся, Царице наша преблагая.

Радуйся, усыновившая нас при кресте Сына Твоего и Бога; радуйся, Матернюю любовь к нам являющая.

Радуйся, во благих желаниа наша дивно исполняющая; радуйся, скоропослушливая к смиренным молитвам.

Радуйся, покровом Твоим святым нас покрывающая; радуйся, ризою Твоею честною благонадежно нас защищающая.

Радуйся, в час кончины нашея всеильная нам Помощнице; радуйся, в мытарствах воздушных державная нам Заступнице.

Радуйся, телес наших безвозмездное врачевание; радуйся, душ наших спасение.

Радуйся, Богородице Одигитрие, христиан упование.

Кондак 13

О, Всепетая Мати, Царице Всемиловитая Дево Богородице Одигитрие! Приими малое сие моление наше и принеси е Сыну Твоему и Богу нашему, Матерне умоляя Его благость, да помилует нас грешных и недостойных, и Твоего ради все сильного ходатайства избавит нас мучения вечнаго, сподобит Царствие Небесное получитьи и тамо со ангелы воспевати Богу: Аллилуиа.

*Этот кондак читается трижды, затем 1-й
икос «Архангельский глас ...» и 1-й кондак
«Избранней от всех родов ...».*

Молитва первая

О, Пречудная и Превышшая всех тварей Царице Богородице, Небеснаго Царя Христа Бога нашего Мати, Пресвятая Одигитрие Марие! Услыши нас

грешных и недостойных, в час сей молящихся и к Тебе со вздыханием и слезами пред пречистым Твоим образом припадающих и сие умильно глаголющих: изведи нас от рова страстей, Одигитрие благая, избави нас от всякия скорби и печали, огради от всякия напасти и злыя клеветы, и от неправеднаго навета вражия. Можеш бо, о Благодатная Мати наша, от всякаго зла сохранить люди Твоя, и всяким благодеянием снабдити и спасти, разве бо Тебе иныя Предстательницы в бедах и обстояниях и теплыя Ходатаицы о нас грешных к Сыну Твоему, Христу Богу нашему, не имамы. Егоже умоли, Владычице, спасти нас и Царствия Небеснаго сподобити, да спасеннии Тобою славим Тя и в будущем веце, яко же спасения нашего Виновницу, и превозносим всесвятое и великолепое имя Отца и Сына и Святаго Духа, в Троице славимаго и поклоняемаго Бога во веки веков. Аминь.

Молитва вторая

К кому возопию, Владычице? К кому прибегну в горести моей, аще не к Тебе, Госпоже Владычице Богородице, Царице Небесная? Кто плач мой и воздыхание мое примет, аще не Ты, о Пренепорочная, надеждо христиан и прибежище грешным? Приклони, о Пречистая Владычице, ушеса Твоя к молению моему. Мати Бога моего, не презри мя, требующа Твоя помощи, услыши стенание мое и вопль сердца моего внуши, о Госпоже Богородице Царице. И подаждь ми радость душевную, подкрепи мя нетерпеливаго, унылаго и нерадиваго к Твоему хвалению. Вразуми и научи мя, како Тебе молитися подобает, и не отступи от мене, Мати Бога моего, за роптание и

нетерпение мое, но буди ми покров и заступление в жизни моей и приведи мя к тихому пристанищу блаженного онаго покоя, и сопричти мя к лику избраннаго Твоего стада и тамо удостой мя воспевати и славити Тя во веки. Аминь.

Тропарь, глас 4

К Богородице прилежно ныне притецем, грешнии и смиреннии, и припадем, в покаянии зовуще из глубины души: Владычице, помози на ны милосердовавши, потщися, погибаем от множества прегрешений, не отврати Твоя рабы тщи, Тя бо и едину надежду имамы.

Кондак, глас 6

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая на помощь нас, верно зовущих Ти: ускори на молитву и потщися на умоление, предстательствующи присно, Богородице, чтущих Тя.

Кондак, глас 6

Не имамы иныя помощи, не имамы иныя надежды,
разве Тебе, Владычице, Ты нам помози, на Тебя
надеемся и Тобою хвалимся, Твои бо есмы раби, да не
постыдимся.